

淵雅堂全集

惕甫未定藁卷四

長洲王芭孫念豐

序三

何蘭士遺詩序

蘭士歿其子弟以若四方知舊屬余序其詩者書十反而余弗報以君葬渴不及銘其藏將別求事行以著見其生平詩不待序也久之未得而余亦衰病臥家空山雨雪恫念存亡余終無以謝後死之責乎哉乃卒爲序諸其詩曰君姓何氏諱道生字立之蘭士其自號也山西靈石人其世繫生出詳余所爲其先公檢討君事狀

乾隆五十一年舉于鄉明年與兄元煥同登史致光榜
進士歷工部主事員外郎郎中遷御史視漕山東出知
江西九江府以病自告還丁檢討憂再出爲甘肅寧夏
知府嘉慶十年七月卒于官年四十此其出處先後也
少受經學于興化顧進士九苞長見吳張塤舍人而大
爲詩以詩求友於天下尤善余有所譏彈應時改定此
其師友淵源也再爲知府皆不久無事可見四爲鄉試
同考官皆得士今福建按察使蕭山王紹蘭號天下廉
能君之所薦拔也書生入工部苦不習料估君獨冠其
曹嘗割宅居余余欲界牆庭中有亂甃堆焉君蹴其甃

縱橫步目數久之曰得矣翌日召匠界廣如余指而輒
適盡其敏達多此類君視東漕訪漕弊于余余時爲華
亭校官就松江事言之其後君見余揚州喟然曰甚矣
官不可爲也吾始以君言問吏吏皆曰無之及今沿路
所聞皆與君合蓋官在則壅蔽多官去則耳目徹以是
推之君之能自警發可知也君之見余揚州值余困甚
窺其意苟可益余雖萬金無惜然方自東漕來洗手無
餘贈余四兩以去卽是君之奉職可知也爲御史會
上親政言事頗施行有大臣薦

上亦雅知君欲試君於外故東漕未訖事遽有九江之

命君力請入 對求改京秩及服闋再起又以請皆不
得卒之寧夏至寧夏未一月爲武人誤劾與縣令某解
職聽勘逾年事白皆還其任君書來不自傷而盡然痛
某令之旣歿卽是君之與人可知也君與兄元烺硯農
相愛同時爲曹郎相代爲御史自弱冠好交老蒼所與
議論多一時鉅人長德不樂居外與俗吏爲緣不獲已
一出誤遭非意悒悒自放于酒硯農貽書屬余戒君飲
君不能用亦不報自此病矣君年少貌皙而頤後乃魁
梧方頤廣顙意氣恢然余謂 上方嚮君官且大起起
必有立于世豈知其遽死死之日妻子無在旁者君故

修謹辭歿以書抵余字彊惡不類平生猶諱言病蓋絕
筆也傷哉余寡諧士大夫相慕或徒以名惟君兄弟契
余甚而君又少余十一歲余晚晚瓠落方欲託君以老
而君竟死所可觀君彷彿獨有詩在烏虜蓋自君歿而
余無四方之志矣書至此不知涕之何從也

嘉樹山房集序

震澤張君翰宣久別不相聞一日忽叩余門來過因留
共飯相對憮然顏鬢各非其故矣顧君猶不得已彊出
應舉訖無獲焉歲歲就食于外自言嚮學之志未衰出
所業示余余讀其文白賁无色清光大來荒江老屋中
有耿著胸次而不能下者其文境如方塘曲礪水波不
興纖鱗畢見渟然于滌盡潭清之後也其音節如晚蟬
獨鶴吸風警露寥然于霜笳曉簃之餘也今天下高談
之士所在林立獨爲古文者差少其爲古文不作高談
而退有自得如君者豈易覩哉然而君亦坐是窮且老

矣君既倦遊將歸爛溪之上讀書送老追古人立言之
義所業益進其貽諸來世當不止是宋以來若李泰伯
王常宗之徒身不遇而以文傳者多矣君雖窮老又奚
足悔乎

鐵制府詩集序

芑孫不自度量刻行所爲詩歌古文辭冶亭先生方巡撫山東得其書爲序以誇異之已而公亦自定其前所行詩增著若干卷命芑孫序諸其端伏念公門生故吏徧天下其能文章善持論把旄持節身在日月之際者故多有乃獨有取于孤賤無所知名如芑孫者豈以其事公久又磳磳不解隨人爲俛仰而言之龕若有可信用是不敢承亦不敢辭皇恐累日而爲之序曰天將以一代之文付諸其人則必與之以高一世之氣廓之以容一世之量其人以一代之文自任則必有其肫然不

自己之情與其欲然不自滿之志古未有不如是而能
以其一日之遭際自存天壤揭諸于世百世者公出滿
洲以進士起家自

高宗朝敷歷中外三十年所結知于

聖天子者不專用文字顧猶以文字爲性命儒生學子
聯茵接轡權揚下上不異老寒士手緝我

朝崇德以來滿洲蒙古八旗作者三千人詩爲

熙朝雅頌集上之

朝

上旣命之名又

親爲製序頒行蓋自

國家肇基建號于茲百有九十年矣然後滿洲蒙古八旗文獻粲然備見于世自非天以一代之文付公公以一代之文自任何繇及是公旣自任以一代之文其才恢恢乎無所不有所爲詩久已傳頌藝林其于字句得失豪芒之間宜無足置慮然公必躊躇審固一再洗削無憾而後卽安今于已行之詩方且不惜重刊蓋古大人君子所欲求盡于事物而肫然不自已歆然不自滿其心之見于詩者猶如是也比者公由巡撫奉

命總督江南江西疆域縱橫數千里嗣此江南西四布

政使司二提督總兵官所領隸文武吏民凡所待治于
公者盤錯糾紛聱牙棘手情勢蔽虧倉猝莫尋其端委
而公爲之措正施行於其間上以報

國下厭時望其心之所歆然不自滿而肫然不自己一
如此詩矣書以復于公并以待讀公詩者其質焉

盛百堂詩序

往在泖東以詩契余蓋又有盛百堂灝元焉泖東詩人之有集者先後皆見余文百堂因以自言余豈嘗忘百堂哉百堂蚤爲諸生隸華亭及余至百堂已自去其籍故余之知之也晚百堂中歲習官文書常在外佐人爲吏垂老猶時時近遊故余之見之也少以見之少而知之晚顧獨使余不忘于心百堂亦若不余舍則徒以詩百堂遊迹不出江南北浙東西遠止河洛中間無邊關阨塞冰天火地可喜可愕之境以發其奇又無金戈鐵馬珠槃玉敦大災劇難奇祥異瑞以助其高華駭怪又

幸無仇離顛沛神殃鬼責以蕩激其無聊不平其生平
所履順無大掀簸故詩亦適肖其分一言一句婉約自
將縣縣乎其思以遠也窅窅乎其深以至也讀者一往
莫知其解三復而與之無窮悅然見才力之外若別有
一物以主之其亦有風人之遺情歟何其移我情也昔
賢論三百篇蕭蕭馬鳴悠悠旆旌正以羌無故實爲獨
到夫獨到者詩之本也方今海寓殷盛英流輩生瓊瑰
絕特才力所驅飈馳電擊雷動雲蒸川岳崩書河漢倒
流往往山經海志漢注唐疏方言稗史恣肆橫出併在
一篇創古未覩於詩之境固益拓矣苟返諸其本質諸

以百堂之詩要未知孰爲近遠此余所爲拳拳不忘于
百堂者也有所不忘于余計亦有所不忘于人者矣有所
不忘于今計亦有所不忘于後者矣百堂老矣姑自刻行
其詩而書余說繫之以待焉

小謨觴館文集序

海內談者相與揚權百六十年來人文蔚起獨士能爲古文者加少以是缺憾于學者余竊不然易堂甬東桐城諸家各持其古文以行天下雖學或有至有不至其傳固絛延而未已也惟排偶之文則幾于曠絕又匪啻百年矣蓋南宋後陳義愈高講于文者愈略坐令漢魏風流一墜不可復自近二三十年老生巾箱中物稍益不靈其爲說益不足以困魁岸之士于是湛博絕麗之才稍稍闕出余少歲亦嘗攘臂其閒蹉跎中隳去而徒業旣默默內自慚惋私以望諸同人妄謂斯文無墜必

有英絕領袖之者何其宜見而久弗見耶鎮洋彭子湘
涵方今魁岸之士而湛博絕麗之才之一也爲善有暇
篤耆文業其爲文專力排偶夫文何有奇偶哉九州四
隩見于書斷壺剝棗詠于詩其文奇歟偶歟莫得而離
判之也班揚極其盛于漢韓柳起其衰于唐其文奇勝
歟偶勝歟莫得而輕重左右之也蓋奇偶之用不齊而
一真孤露吹萬畢發氤氲于意象之先消息于單微之
際上者載道下者載心其要固一術爾湘涵少長邊徼
多接通流精求緣起熟析利病有山川以助其奇有風
雲花鳥以壯其思又不幸久困有羈愁騷屑摧撞拂鬱

以激宕其中之所存繇是侘辭異采匪意橫發長篇短章隨變雜施持原以往扶氣以立陽開陰闔神出鬼沒而一皆以自載其心湘涵不自知其文之爲偶爲奇讀者亦且忘乎其爲排偶之文焉余胥䟽江海所嘗默默悵望于海內同人者遇湘涵而快然一慰又憮然深惜其能歎其猶未焯然見褒錄于當時也雖然湘涵年未四十鏤而勿舍計必且恢之彌廣異日推其所潤身者以華于國何遽不鼓鐘一世將余所謂英絕領袖曠百年幾幸見之者亦在湘涵所自命何如而已會其所刊小謨觴館文集告成過辱不遺謂序斯集非余莫宜燒

燭循覽輒不自禁爲夸詫之如是

明李文正公年譜序

別時帆忽又五年陶山還自京師得所輯明李文正公年譜曩余往來時帆家累嘗過所謂西涯者相與劇譚文正遺事文正與先文恪公偕相明武宗劉瑾之難先文恪公與劉謝諸公後先皆罷而文正獨留當國低徊久之文正始固與諸公同心旣而不終然先文恪公晚所著書或稱賓之文學或略弗道自餘諸公於文正皆然不徒推見諸公忠厚亦有以知文正生平雖不見與於清議實有見諒於諸公者蓋公之留未始非欲爲姚崇之應變不自意乃成胡廣之中庸天下讀懷麓遺文

常以是惜其人而哀其不幸年譜義從稱美時帆蒐采
既博陶山續加釐訂其行事爛然具在使公所嘗見諒
當時者并可白諸來世時帆以居近陶山以同鄉二君
敦雅其風尙自非一世所有要其端皆感發於文章然
則文章之載於人心而不可亡又有非相業所可同論
者在耶公卒於正德先文恪公卒於嘉靖今皆三百年
懷麓震澤兩家遺集俱誦人間獨懷麓無趾可尋墓祠
茫昧皆待時帆以發之吾家怡老之園清蔭之堂雖幾
就廢然庭中怪石所刻勝朝黎獻之文牆背高松依然
前代風霜之色所謂賓之題墨往往在榜軸間淋漓如

濕余誠無所肖似猶獲助二君以增刪勘定其間執筆
爲之序其於文章氣澤之傳家門榮落之感爲之軒眉
爲之揮涕又有非二君所及知者矣

賞雨茆屋詩集序

余序賓谷詩三年而不成賓谷訝之同遊之士訝之余亦自訝之雖然余卒無以序賓谷詩乎哉今有以高一世之才空一世之氣蚤踐清華出膺臚要據江山風月之勝兼文章賓客之能如是其於吾人遭際亦可必得乎曰不可必得矣今有處得爲之地蒙非意之干負饒樂不可勝之名抱詰屈不自存之慮隱憂顯責萃於前騰譏竦訕交於後摧去牙角自同於庸駘裏奇橫雷轟腸腹如是亦有樂焉乎曰無所樂之矣以無所樂之心居不可得之境榮觀歲仍孤危日至絲是惛惛焉悄悄

焉有苑而結有萌而達有所可言不可言有所得言不得言有所欲言不欲言雜相起伏一息萬端而其所欲言可言得言者一旦得諸心而注諸手如泉焉咽乎谿澗之間屈折乎迴谿枉渚高高下下忽而墜壑爲渴驥爲怒猊如雲焉觸石而起蔽虧乎巖崖隔限乎林麓二色而霽三色而素五色而卿象爲牛馬或爲樓臺如風焉飄飄然起於無何有之鄉經乎廣漠薄乎畏佳盛怒乎土囊之口窶者叫窪者突曰者呬忽而拔木蜚瓦排山倒海雨雪總至鬼神下來若然者自古詩人之遭也自古詩人遭之賓谷亦遭之然則世所羨賓谷而賓谷

所無以自申者天直以是往復磨厲成就賓谷而昌其
詩賓谷爲人敏達而恢疎文字之好最篤其於文無所
不能而講於詩者尤詳爲翰林曹郎不異諸生時爲轉
運使不異翰林曹郎時今所錄存曰賞雨茆屋詩者裁
八卷蓋其謹又如此昔有議歐陽氏窮而後工之說爲
未足以盡詩人余獨不然夫窮非必以貧賤也有時富
貴而窮乃窮之彌甚者也賓谷雖天性工詩非必有藉
乎窮要凡所以往復磨厲成就之如此何一非天之所
爲併氣積力以昌之而賓谷詩亦遂行天下其詩蓬勃
也如風瀾漫也如雲澎湃也如泉讀者之所見也而所

有觸於石有咽乎谿訝有怒乎土囊之口者世或不具
知余窮者徒也故遲之又久獨操歐陽氏之說爲之序
雖固窮者之謫言哉後將有慨然而得古今之變者在
於是

鶴泉詩鈔序

高郵夏醴谷先生以博學鴻辭受知

高宗朝領文章之任善得士所得朱仕琇戴祖啟茹敦和之屬位不顯而著書名天下天下無識不識推先生鉅人長德先生旣老壽家居數十年有子曰曉春其字南芷以鄉貢出知山東滋陽縣久之拂衣歸養先先生五年而卒卒後二十五年其子味堂奉南芷所爲鶴泉詩鈔抵余揚州求爲論定余不及避先生父子間無繇知南芷生平而味堂之來也禮恭而意勤以詩投余渺然有生不見古人之感余雖媿謝誠無說以辭之廼頗

刪替定著其詩爲若干卷爲之序曰自古文章之傳快然無憾於父子再世之間者常少况乎再世而又傳之如南豐曾氏之自致堯以訖鞏眉山蘇氏之自洵以訖過其於人世福祥之應蓋視科名官職爲尤難而尤可貴重惟君少承醴谷先生之教惇學修文以循良自著又以其餘甄風酌雅寓意山川極命草木篇翰淋漓富羸千首此其詩之可重固不必一一以工拙求之而矧其詩之悱惻淵和憂深思遠又且工到若此而味堂鄉舉不仕繼起讀書長子孫以娛侍君於生前今茲老矣又復葺行其詩於身後此誠不啻如曾之有鞏蘇之有

過世之讀鶴泉詩者方且快然於人世福祥之極超然
有所自得於意言之外而余猶不免較量尅畫斤斤聲
律對偶間刪其太半今所校定在錄者止於是是則余
之過也夫是則余之過也夫

汪西邨詩序

余往者求詩泖上而弗得也于是慨然作二布衣傳久之得汪君西邨西邨浙之嘉興人僑居泖上餘三十年其羣從兄弟登朝顯仕而西邨落然無俚壯歲試京師不得意歷齊魯燕趙間悲歌慷慨還歸泖上所居西郭門外版扉老屋門巷蕭然以賣字爲活行吟自遣聲出金石焉余過其廬花藥蓊藹帟墨狼藉懸魚束脯酒籌菜把陌錢裹餅錯雜左右皆求書者所致然泖上之人爭購其書而余獨稱其詩西邨之書縱橫跌宕所涉非一家大要歸本二米米法以險急峭拔爲能西邨用

其法爲書又以用之詩其詩喜橫豎自騁夷奧曠邃不
名一長大要五七字古體爲尤勝收攝豪橫覃精擢思
使筆如劒芒鍛四射所嚮摧陷極側附傾欹之勢臨危
據槁若墜若偏而淘汰融化一造于深穩昔之稱詩者
曰香象渡河其稱書者曰怒猊抉石余讀西邨詩不知
是一是二然後歎西邨之神乎技也間從西郭門外步
以過余軟腳繫鞵疲曳街市間坐定喘息脫其帽髮鬢
鬢老矣余見未嘗不悲之而西邨殊怡然有以自樂者
旣別五六年行李之往來時時問西邨猶居西郭門外
老健可喜賣字如故今者刻其詩以書抵余屬爲序余

茲五十落鬼江淮間驟衰形狀不啻如西邨前日自以
心耗誠作詩轉頗學書而惜西邨之間濶不獲相從盤
礴上下其議論也故著其能書并序生平涯畧亦使後
之讀其詩者有以想見其人云

莊蕤川十國宮詞序

余在泲東未及識莊君蕤川君所授業何生其偉以其
十國宮詞來問序亦未及爲也今六七年矣蕤川復悉
寄生平所爲詩生以書述君之意甚勤念君隱約鄉閭
以詩人自老而何生拳拳欲聞其師于當世義有足多
者乃卒爲序之其十國宮詞之首曰歐陽五代史創例
從孤離析亂中引繩截界以爲十國世家年表不數千
言而十國之興衰起仆始末瞭然其間若吳之錦城蜀
之醉妝閩之寶皇春鷓漢之以玉樓試瓜諸瑣瑣可喜
可愕未嘗不具見其中余常歎爲文章之極而世或謂

其詳未逮薛史今薛史復出餘姚邵二雲學士補其闕
又加詳焉然其所爲不如歐史者自在也蓋歐公以小
雅念亂之憂示風人綦巾之樂變詩義爲史法故讀其
史杳然覩詩心焉薛史則徒紀事焉而已宮詞之體詩
也而有繫乎史者也蒧川所作百篇蒐羅鴻富旁及稗
野而大要出入于歐薛兩家之間其詞溫密兼有王建
花蕊數家之遺自非其人悅學而文素有淵抱未易臻
此顧歐公以史寓其詩後人卽可以詩合諸史然則如
蒧川殆可與之讀史者歟上下我生數十年泲東文獻
之傳亦少彫疏矣蒧川其將盤桓風月以詩送老抑將

追從曩古極論天人之際綜合諸史橫豎鉤貫以上詩
詩春秋所繇絕續之緒卓然著書以自名于後耶序其
詩又慨然欲以論少年英邁若何生者也

聽雨齋詩集序

余今始識白广于揚州然余之識白广久矣余之識白广以其詩以其畫以其峴然不可一世之氣與其盎然不自掩抑之情而白广之識余也未見則以其畫寄余既見則遂以其詩屬爲序古者一書不兩序今茲序白广詩者舉天下名能文章無慮數十人皆樂爲之言其于白广之才之學之志發揚蹈厲固已無所不至余何以益之且使舉天下名能文章數十人猶未足以發揚蹈厲乎白广之才之學之志雖益以余又何加焉然而白广之屬余也勤勤如不容已如不及待亦顧何哉徒

以余未見白广而能識白广也天下識其面不如識其
心識其心不如得其人詩也者固肖乎其人以出而載
心焉者也余始未見白广讀其詩識其心而因以得其
爲人則雖終老死不見白广其于序白广詩莫余宜况
乎亦旣見之而辱重屬之也哉余嘗論古今人遙遙不
相見獨其精神之相接懸解冥契恍然如一日者獨賴
文章而詩其最也詩之爲道上者積心焉下者積字焉
非積字焉無以載其心然所爲積字焉以載其心者非
以矜寵乎目所見之人蓋將遙遙以待後千百世目所
不見之人已爾人生忽忽一世一世寢而爲千百世目

所見之人寢而爲目所不見之人然則後千百世目所
不見之人猶之生並世目所不見之人已爾能使目所
不見之人生並世而有以得之則夫後千百世而亦必
有以得之白广之詩將以待後千百世目所不見之人
自必取決于生並世目所不見之人以生並世目所不
見之人之嘗有余也則余之序白广詩誠烏可待烏容
已遂爲序之如此

韋靜山文序

余初見靜山富陽董公之家靜山方當爲知縣氣壯甚已而靜山官畿輔不得意稍遷棄而爲遊遊十餘年與余相遇江淮間困甚鬚髯然白矣靜山以名公子蚤成晚躋躊躇一飯今日士大夫居世有不可知者事足感歎然靜山之學則以是大進靜山學主說經而通敏曲達于時務旁通醫術其爲人謹于取舍善談名理其爲文不甚講求文律意之所到務委折自鬯其說不苟止亦不苟同乃者出其所刻文示余屬余爲言余論文主古人義法又好持已所明以律其不衷者常爲一世所

不樂聞靜山誠何取乎異已者而屬之言豈以其謹取
舍不苟止不苟同之素操行有麓似靜山者乎抑誠見
學無止境由異成和不以已所能者自爲足更將博取
而沖挹之雅先及于鄙人乎靜山年今六十有內養顏
貌雖衰神明未改自此功名榮進之想日以銷實仁義
道德之積日以增加又不嫌于異已而虛與逶迤精其
消息其文心之所鬱于中而大作于外者豈余瑣瑣謏
聞所能咫尺裁量之也哉

史恒齋試帖序

往與諸翰林偕爲五言八韻詩課其時吾友溧陽史恒齋方與余同事 官館獨不來入課但時時作詩攜以示余館中余爲點識利病抉發其所以然余旣去京君亦旋出及余再入京師士大夫誇頌恒齋詩大似鐵夫出其所留藁觀之詩皆警絕一氣盤旋不見首尾若泥在鈞金在冶隨範賦形變怪莫測余亦詫歎恒齋才力至是且十倍過余豈獨似余也哉久之君爲興化教諭以憂解職復相聚江淮間意忽忽不自得然所爲五言八韻詩愈奇以工恒齋志潔行修介然爲篤古方聞之

士其學尤長于說經由小學以疏通經義旁精中西算
數鉤剔深隱排去壅閼方爲大戴禮義疏未成其于詞
章若未暇數數者然出其緒餘猶足壓倒一切如此余
恐其嗣此家居仰屋將別求絕業以自寄或于舊所爲
五言八韻詩不自料理付諸棄餘可惜也故今爲收其
藁而刻之揚州余前所刊行同課詩迫于出京僅得九
卷蓋未及竟其後翻摹遍天下坊賈遽名之曰九家詩
其實當時與于課者尙有遂寧張檢討問陶寧化伊郡
守秉綬介休劉侍讀錫五靜樂李按察鑾宣永康熊儀
部方受吳江家侍御祖武汾陽曹給事錫齡涇縣吳侍

讀芳培峽江習郡守振翎以及往來無常數者十餘人
非止是九家也今恒齋詩出世容有好事者取而合之
前編以爲十家者乎雖然此非余與恒齋之所欲問也
已

朱井南左國續補序

韋昭之序左氏外傳謂雅思未盡復采穆王以訖魯悼
其文不主于經南宋姚宏之校高誘戰國策謂訪得春
秋後語始克是正吳師道言春秋後語晉孔衍所著賴
此見其一二蓋自孔衍之書亡佚不見于元明而左氏
以後通鑑以前中間國故之茫昧無徵久矣近流所著
愈出愈多古籍日亡日少此學者之所無如何也前編
外紀所以推廣通鑑者不一書而自春秋入戰國其間
六十年故書雅記脫漏常多網而集之故非易易歟朱
君井南惇學好古耽心經訓湛冥誦讀無閒居遊于凡

秦漢諸子衆家之言有繫乎周威烈王魯繆公之世者
咸加筆錄依年排次以爲左國續補若干卷蓋井南亦
未見孔衍春秋後語之書而大意實與之合秦漢去古
未遙雖有傳聞異辭不衷一是或公羊所謂不修春秋
及百二十國寶書之遺猶有在是且亦韋氏所稱不主
於經者也井南方在客授計行篋不常有書非更數年
恐不得廣蒐極覽以完究其業如遂成之俾學者于稽
經誼史之間彌此一闕憾豈非快事哉辱井南不遠千
里屬草藁未定先以諭余余媿荒落無以贊其所不及
輒書是以誇勸慙愚之云

師華山房文集序

上元戴生衍善以文贄余揚州讀其辭接其人莊莊然有老成之風心異之叩所從來乃知爲故國子監學正戴未堂先生子余故嘗聞先生以宿學主關中書院吾鄉畢尙書論薦授官以歸其時余爲諸生家居未及相識因從求先生遺書衍善貽余所刻經說又出所未刻師華山房文集得備見先生爲學大指先生之學本諸躬行其言發自心得讀其文凡余平日所嘗欲言而未及言未能言者往往皆在不啻若探余懷以出之慨然念先生往矣斯言也其不可不聞於斯世力贊衍善付

稗而衍善居貧守先生之教不干貴游久弗克就會余
自刊文集訖事有棗梨之便遂與勘定爲四卷附以語
錄一卷刊行之自科舉之利興士或不說學而荒于古
因之一二聰明才杰之子奮以漢學自見于是有惇學
好古終其生而惘然無得于身心無見于行事者彼其
所謂漢學者則真漢學矣以爲自古聖人賢人所以禔
心修身治人之要在乎是而學者決宜從事焉則固未
然也先生述其家東原晚歲病困自言生平讀書茫不
復記到此方知義理之學可以養心烏虜其亦可傷也
己夫所謂聰明才杰者其所得未必人人果逮東原卽

快然無憾于東原矣而聞東原易簣之遺言亦有矍然
自反窅然自悲者乎余旣早裴浪蕩廢業不免如柳冕
所云平生好文老亦興盡獨有味于先生之言不欲使
之無傳昔人論文有待五百年後揚子雲之說余謂如
先生者更數十年必有摩索殘煤斷楮中興起慕樂而
以余爲知言者豈必待五百年哉姑爲序以質諸其人
焉

洞庭嚴氏族譜序

嚴莊皆出于楚芊姓其初蓋夾潞鄭氏所稱以謚氏者也厥後避漢諱易莊爲嚴終漢世皆以嚴著然唐宋後又自歧出其閒分合有不得而知者矣其不可得知者不必強以知之也就其可知者而爲之譜于以敬宗于以收族豈非君子所有事乎洞庭東山之嚴于吾蘇州爲右姓自其先彰德知府經以進士起家明宏治中爲循吏而其家始大萬歷中隱君果始譜其世刻之及是餘二百年矣隱君之爲譜不援貴宗不追遠胄獨據所知用歐陽蘇氏遺法僅及十世然二百年來子孫蕃衍

相仍日昌日熾故編修福試禮部領袖天下士登
朝事

高宗純皇帝爲文學侍從居恒讀隱君之譜慨然念隱
君舊序所諄諄于以時增益者不可以更待也亟欲續
修屬藁未定而卒其族人某恫編修之齎志乘代緒之
未湮繼爲蒐采訖事介余族人以來示余屬爲序余嘗
論譜法在今惟歐陽蘇氏爲可據唐以前設圖譜局置
郎令史領以通儒官私相糾察所成書動數十百卷義
取賅博宋以後門望旣衰流品亦廢文人學士各譜其
世闕所不知大抵不過一卷之書義取簡約歐陽蘇氏

又隱以先王收族敬宗之意寓乎其閒傳信傳疑可次
可大其又簡而賅約而能博者也今隱君用其法于前
編修繼其志于後某又能推隱君未已之心而終編修
未竟之業是非惇宗服義之君子而能然乎嚴與吾家
累世有連當彰德之歿也先文恪公銘其藏逮彰德子
滂之歿也先中書公銘焉余與編修之子榮于世法中
又爲同年比來上冢山中登碧螺玉筍諸峯父老指示
余嚴氏先塋所在巒厓渾厚草木華滋德人之宮森然
天得于是歎嚴氏之世未有艾其譜亦且不一書也故
因某人之請而樂爲序之如此

族弟芸巖詩序

吾家羣從百數攜筐持被挾一管才丁就有司試者不
乏求其自喜文字之間高視濶步如昔賢所稱翩翩有
一種風氣者幾乎莫覩余蓋涼涼于孤另之中悵然重
家門之感也一日吾弟桂芳自其河南官所寄所爲詩
至其詩結冷煦鮮逞妍鬻婉筆足以逮其意意足以宰
其辭句者畢出萌者必達扶疏極致而網絡相引樞轄
具存嗟乎妙哉自非天機獨得者之篤而爲之勤何繇
及是雖然桂芳侍親河干蚤涉世故前此不能無役志
于科舉及以才能受知大府累邀論薦驟膺繁劇一官

寵頭獨以應務之間伸情豪素大抵作詩功多讀書功
少故能縱其好于詩中未暇究其心于詩外嚴滄浪言
以詩入詩最是凡境少陵言讀破萬卷自古詩人能自
立家未有多讀書者孫權之謂呂蒙蔣欽曰孤豈欲
卿治經爲博士耶但令涉獵見往事耳蓋多讀書則天
地民物之故禮樂刑政之繁大而典法密而身心上之
鬼神與謀下之託喻草木載籍極博皆有以入吾心之
空曲隱微而達其神智夫詩亦神智之苗也當其讀書
豈爲作詩而詩之所作必有不求異而自異者桂芳年
富力強稟賦通敏試以吾言求之將見尺一之牘舟車

期會之頃無往非書無往非讀書之地嗣是積諸中形
諸外下筆不同于今人無疑也深之以閱歷傳之以哀
樂其并不同于古人又無疑也夫其學可以會古今之
變則凡所自見于天下後世固將不止于詩而于爲詩
之志愉快又孰甚焉余漸衰息影塊然爲田舍老公文
采風流銷落都盡意外得桂芳詩爲作數日喜深幸吾
門未墜吾雖孤于世猶當不孤于其家遂與點定並書
以敦勸之云

陶山詩錄序

余與陶山故有蕭望之雅意本朝之願不樂處外迄皆弗遂余旣蚤衰自廢君成進士迄爲州縣江南起伏迤邐其中十有餘年遷領方州累權大郡在世法不爲不遇要之非其好也然陶山之學則因是大進學進詩亦與之俱勝陶山旣悉寫入官以後所作略仿古人一官一集釐爲若干卷以示余屬爲之序夫以陶山之才屈爲州縣州縣亦今天下速飛之器也上不難如古循良立名奏效下亦不難因緣薦寵獵取旄節焜耀一時今顧不然而徒捉手版望塵趨風今日拜于塗而明日衙

於府而其間又不能無行役之勞簡書之迫期會之繁
與夫事物是非相感觸於是含豪伸帑以一官昌其詩
何爲也哉君始至荆溪以大買書逋其帑肆力讀之其
後改官五六處輒與書俱暇則訪其山川交其學士大
夫蒐舉湮湛褒存墟墓其中之所省然莫釋殷然欲達
者往往不克施諸官則以寓諸詩而詩乃哀然如是矣
假令陶山當日幸不爲州縣爲州縣不至江南又幸如
前所稱把麾握節去爲貴人必且不暇爲詩卽爲詩必
不能縱所好於讀書以立其爲詩之本而多其爲詩之
助如今無疑也然則陶山之詩未始非陶山之官之逋

邇起伏有以推排激宕而成之今此一官一集志其官者凡以志其學而已君爲人色夷氣清議論必依於忠厚不爲崖岸嶄絕而臨事審然見可否尤善因事爲功掾十一于千百所陳利害得失或不能驟當於上官久而卒無以奪之以是宰相與倚辦加之揄揚比者最計而還攝郡于此蓋陶山之詩成而官亦自是將起矣雖然以陶山之人之才之學一官十餘年徒用昌其詩卽所謂因事爲功者亦徒一二於詩見之後之讀者亦且論其世而慨然有感於余言也夫

彭蘭臺遺詩序

余及事彭尙書而與二林先生有忘年之契因識諸彭羣從蘭臺當日年最少以材敏愛于尙書尤爲二林所稱許年十六補諸生又十年舉于鄉自尙書棄養二林之學佛益專蘭臺習其說幾乎非西方之教勿言然不廢科舉一再試春官余猶見之京師別去未幾二林以書告君之喪年甫三十三耳彭在吾吳二百年世世積德內脩其行而外力于科舉以是爲家法吳人之喜爲善類取信于彭氏其一門相次登朝通顯獨蘭臺不遇而天皆數之不可知者蘭臺平生著書有淨土聖賢

錄二十二史感應錄大指不離乎佛其効也不自悲而悲世之迷不識佛者二林以書貽余亦不悼其効而羨其西歸之早凡其相證相知別自有在余豈足以知之哉蘭臺劬二十年其子蘊章時時過余話舊因出蘭臺所遺詩屬余增訂蘭臺詩二林前已刊行願其意主於佛蕭寥乎多遺世之音余茲以世間人用世間法于二林所錄外增著九十餘首俾蘊章刻傳之雖未知於作者意何如要之以世間法論世間文字當如斯矣蘊章幼孤惇學而文慨然有志誦先述德以余之孤于世蘊章不我遐遺復續往時二林之遊其意量有過人者茫

茫天壤數不可知而有可知蘭臺異日殆將食報工是
然則其不達而無年誠未足悲也

儕嶠詩集序

儕嶠于今天下交遊莫余久故自爲諸生取科第登
朝出入中外三十年凡其出處大略下逮家人蠟屑以
若性情意趣之所存知之莫余悉則于序儕嶠詩莫余
宜及是甘肅布政使同年嚴君匡山裒取其生平古今
體詩若干卷刻以行世爲之序曰儕嶠以其先大父府
君爲吳縣學官生于吾蘇州故以爲名少通敏承先公
東田先生之學博覽強記操紙筆數千言不自休南昌
彭文勤公視學試蘇州得余夸異之及試江陰得儕嶠
童子中大驚又用以夸余蓋蚤成若此其爲人剛中有

守介特無所倚不隨形勢爲燥濕居恒混混處儕俗不見厓岸遇所不可雖百責育不能回其意旣登詞館猶以貧授書自給出無車馬并斷造請在翰林有名未嘗一得衡文之任爲御史敢言蹈愆悔不自知久之出守衛輝守郡者相沿皆默視上官意指不自出可否其于州縣委曲將迎先意承志或有甚于上官君獨時時奮髯抵几無鉅細一手操之大要歸于忠厚而實事求是不苟依違以是動輒多忤見謂難近然君故精潔無可吹求尤善折獄他守所疑難君至立剖其間上官有清正者卒倚重君卒薦最以獲 召對君旣入對念太夫

人在鄉日久引疾遽歸歸三年滑縣事起河以北魚爛
不可問人始服君前此之治又以見推重云余與君偕
受知 高宗朝京居相鄰比以詩相贈答其後君所涉
廣所作益多感物造端情辭婉約吐納風流不類其爲
人讀者將有訝如宋廣平之賦梅花韓昌黎之詠銀燭
金釵者夫廣平昌黎豈欲爲如是鐵心石腸之人哉風
會相激勢使之然而蒙謂之鐵心石腸彼其中固自有
惻惻乎與世俱深未易喻諸人者故余序儕儕詩特表
著其詩之所不載庶後有知言君子論其世因以想見
其人焉